



Հույժ սիրելի՛ ծայրագույն վարդապետներ, վարդապետներ, քահանաներ, սարկավագներ, մայրապետներ և հավատավոր ժողովուրդ,

Մույն գրով գալիս ենք ամենքիդ մեր ցավակցությունն ու մխիթարական խոսքը հղելու՝ մեր Երանաշնորհ Կաթողիկոս Պատրիարք Ամենապատիվ Տեր Ներսես Պետրոս ԺԹ-ի մահվան կապակցությամբ և ի լուսավոր և անմար հիշատակ:

Աստծո կամքով և կարողությամբ, ի գին զանազան դժվարությունների և առողջական ծանր պարագաների, Երջանկահիշատակ Հայրապետը հոժարությամբ և սիրով ծառայեց՝ ի սպաս Հայ Կաթողիկե համայնքի պայծառության և յուր փարախն առաջնորդեց դեպի դալար և հանգստավետ վայրեր: Ի փառս Աստծո և վասն Հայ Եկեղեցու ամրապնդման, պահելով անաղարտ նախնյաց ուղղափառ հավատը, Հայրապետը՝ ներդրեց յուր ամեն կարողություն:

Հայ ազգի համար դարակազմիկ այս տարում Ամենապատիվ Հայրապետը, գործակցությամբ Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի և Ն.Ս.Օ.Տ.Տ. Արամ Ա Մեծի Տանն Կիլիկիո Կաթողիկոսի հետ միասին, իրագործեց 2015թ. ապրիլի 12-ին Հռոմում Սրբազան Քահանայապետի ձեռամբ մատուցված Սբ. Պատարագը և Ս. Պետրոս տաճարում, Սրբազան Քահանայապետի կողքին, յուր աղոթքը բարձրացրեց առ Բարձրյալն՝ ի ոգեկոչումն մեր սրբոց ապրիլյան նահատակաց Հայոց Մեծ Եղեռնի: Ցնծաց և պատվեց յուր սուրբ նախնյաց, երբ Հայ Եկեղեցու սրբալույս աստվածաբան և փիլիսոփա Գրիգոր Նարեկացին հռչակվեց Տիեզերական Եկեղեցու Վարդապետ: Այս հիշարժան տարում լրացան Ամենապատիվ Հայրապետի քահանայական ձեռնադրության հիսուն և եպիսկոպոսական ձեռնադրության քսանհինգ տարիները, ինչպես նաև՝ Հայրապետական Աթոռի գահակալության տասնհինգ վաստակաշատ տարիները:

Աստծո բարի և հավատարիմ ծառան մտավ երանավետ և անսպառ Արքայությունը: Միրելինե՛ր, վշտի և ցավի այս պահին Բարձրյալն Ամենագոր և Սուրբ Ավետարանը թող օգնակա՛ն լինեն բոլորիս, ա՛յս է ճանապարհը մեր, որ պիտի հետևենք մեր Ամենապատիվ Հայրապետի օրինակին և գտնենք մխիթարություն և համբերություն:

Մեր աղոթքն ենք բարձրացնում առ Աստված՝ կնքելով մեր խոսքը Ս. Գրիգոր Նարեկացու աղոթքով.

«Եվ մխիթարի՛ր, բժշկի՛ր, քավի՛ր

Ու կենագործի՛ր նախկին օգնությամբ՝

Ընձեռելով ինձ օրհնյալ քո ձեռքով

Զորություն՝ վերջին տագնապիս պահին:

Քեզ վայել է փա՛ռք ըստ ամենայնի



Հավիտյաններից հավիտյանս. ամեն»: (Բան ԼԸ)

Հ. Գ. Արդեն իսկ մեր հոգևոր դասը տեղյակ է, որ հաջորդ կիրակի՝ 05. 07. 2015, հայ կաթողիկե բոլոր եկեղեցիներում մատուցվելու է Սուրբ և Անմահ Պատարագ, կատարվելու է Հոգեհանգստյան պաշտոն՝ Երջանկահիշատակ Կաթողիկոս Պատրիարք Ամենապատիվ Տեր Ներսես Պետրոս ԺԹ-ի հոգու հանգստության համար: Մեր խնդրանքն է ամենքի՛դ՝ հավատացյալ ժողովուրդ և հոգևոր դաս, միասիրտ և միակամ խնկելի ձեր աղոթքով հիշել և պատվել Երանաշնորհ Հայրապետին և կրկին անգամ փառս մատուցել Ամենաբարի և Ամենախնամ Աստծուն. Ամեն:

Ձերդ աղոթարար՝

Բարձյն. Տ. Ռաֆայել Արքեպս. Մինասյան՝

Առաջնորդ Հայաստանի, Վրաստանի, Ռուսաստանի

և Արևելյան Եվրոպայի կաթողիկե հայոց

29 հունիսի, 2015թ.